

Haushale, Zoständ, Jeschichte

En Stellung joh

Rosemarie Bongart

Wor dat e donkel Kapitel fröhe, en der Ze-
weit, wo de Mädche ous de Schull entlas-
sen wuten on kein Liehr für en spädere Beruf
antrede konnten. Denn, wie wor der Tenor der
Äldere, „Dat heeirut jo doch eis, also brouch et
nix ze liehre, et es versorch“. Et blev also nur
der Ouswäch, en Stellung, sprich, als Hous-
haltshilfe bei der Herrschafte, dat woren fröhe
die jod Betuchte, ze john. Vorausschecke moss
me, die Ehen helten fröhe e Lewwe lang, ejal,
wie se och imme lefen, denn die Mädche woren
onech de Haub. Höck hät sech do alles
jeändert on et es e Jlöck, dat all Mädche en der
Laach senn, en Beruf ze liehre, der inne spåde,
ejal wat kütt, e Ouskunn sechert.

Fröhe wud en de Familieje jo noch vill vezellt,
me trof sech off met sengem Klan on mir hann
als kleine Dotz natürlech de Uhre objesperrt,
ömm ze hüre, wat do verzellt wud. Su kohm och
atemol ze Sproch, wie et einzelne Mädche op
ihrer „Stell“ erjange wor. Dat woren off kein
schöne Zoständ, die se erwade däten. Höckze-
daach jingen de Jewerkschafte op de Barriken-
den, ömm Rechte enzefordere, domols woren
dat noch Utopien.

He en oose Jäjend jov et net e su vill Stelle, de
Provinz wor em Durchschnitt arm. Su hieß et
avwandere no Bonn, Kölle, Trier ode sonswo-
hin, jedenfalls für domolije Verhältniss weeit
weg von deheim. En de iechte Zeeit hät die
Mädche et Heimwiew schon jeploch. Der Luhn
wor bescheiden, met andere Housmädche mo-
ten se sech e Zemme deile. Fröh morjens hieß
et opstohn, de Owwe stoche, alles sauber ma-
chen, damet de „Madam“, die wollten och
„gnädige Frau“ jenannt wäre, met ihrer Sipp-
schaff et Fröhstöck vereinhahme konnt. Et
Denspersonal dorf derweil en de Kösch tafele.
Donoh jov et allerhand em Hous ze dohn, all
Bude enem Hous wuten op Hochjlanz jebrach.
Met Arjusaure hät die Madam kontrolliert, ob

och kein Stöbkönche mieh ze entdecke wör. Bei
der jeringste Onregelmässechkeit wor de Ma-
dam dann kein fein Madam mieh. Einige der
Dienstherrinnen hann och die Ehrlichkeit ihrer
„Perlen“ op de Prüfstand jedohn on hann, wie
nixnotzech, e klein Jeldstöck onech de Teppich
gelach, on jewaat, ob dat Mädche dat Jeld-
stöck och widde erousröcke dät. Schon domols
jov et och jewitzte Mädche, eint hät net foul, e
Pfennechstöck dozo jelach on als die Madam
onech der Teppich jekuk hät, moss se jruss Au-
re jemach hann, wut vezellt. Domet hat dat
Mädche klarjestellt, dat et kein lang Fengere
moch. Natürlech jov et och Herrschafte, die
human zo ihrem Personal woren on och noh
dem Ausscheide von der Stell en jode Kontakt
jeflecht hann, bei der Hochzeit des Mädchens
och jet springe leten. Oussedemm hatten se in-
ne vill be-ejebrach, wat Houshale on Bildung
betrof. Leider woren die Löck äwwe dönn je-
sät.

Die Arbeitszeit beschränk sech net op jewesse
Stonde, woren abendliche Empfänge em Salon
anjesaat, su wut bes en de Naach jewullach (je-
schaff), die Jäss moten bekoch on bedent wä-
re. Atemol jov et von der Jäss e Drinkjeld. Et
woren äwwe och gewisse Herren dobei, die sech
net als „Jentlemen“ benohnen on lästech wu-
ten. Och do hiess et sech jeschick ous der Affä-
re zeje. Am andere Morje jing et widde bezeiht
ous em Bett an de Arbeit, ejal wie lang se je-
schlofe hatten. Die Mädche woren fruh, wenn
se met op de Maat john durften zom enkaufe,
domet se eis jet andech sochten. Denn Owends
erosjohn wor net drenn, wohl Sonndachs noh
Mettach, jow et e paar Stöndche frei, se trofen
sech dann met andere Mädche ous der hiesigen
Jäjend, die ebenfalls en Stellung woren, ömm
e bisje ze flaniere on och noh de Jöngelche ze
kuke. Denn manch Mädche hät do de Mann für
et Lewwe jefonne. Em Alljemeine bei dem Ous-



*Dienstmädchen
„En Stellung“*

lauf beref me sech op de Aufsichtspflicht, mer der et äwwe em Hous selvs, he on do, net weit her wor, denn do jov et och, su soll et vürjekunn senn, die Nachstellungen des „jungen Herrn“ on och de Housherr hät, wenn ihn de Johannistrieb erwischte, de Loss noh Kalbfleisch überwog, Avance jezeich, die net zom Besten von dem Mädche woren. Dann kohm e nöü Kapitel, wat vezellt wud. Wor dat Mädche net resolut jenoch on leichjläubech, su wor dat Mallör do. Et Resultat wor, kuzehand hät me et vür de Dür jesetzt met dem Arjument, et hät selvs schold an sengem Elend on wer wöss schon, wo et sech jet enjefange hät. Die Heimkehr wor bette, off oussichtslos, wenn et kein verständnisvolle Äldere hat, die ihm dann zor Se-eit stonden. Die Mädche on och ihr Kend, woren jebbrandmarkt, on winnijje wert, wie andere Mädche. Wenn se jeheerot wuten, moten se nenn, wat se krochten, on dat wor net imme et Beste. Fälle jov et, do hann Mädche sech ömjebach, weil se net ous noch enn wossten. Stell on heimlech dät me se onech de Äd bringe op em Kirchhof, ohne Pastur, ohne Mess, op dem Stöck, wo och andere Selvmörder ihr letzte Ruhestätt jefonne hatten. Name wuten jenannt

on me kont Mitleid eroushüre met denne Önjlöckleche. Doch et jov och jodes ze berichte, von denne Mädche, die en jod Stell jefonne hatten on sech Kenntnisse anjeichnet hatten en Houshaltsführung, Sparsamkeit on Maniere, wo se besondech stolz drob woren. Jelach wut üwwe ein Jeschich, die e Mädche verzellt hat, dat wor net op de Kopp jefalle on hät sech jeweht su jot et jing be-ei der strenge Madam, die an Koss on Luhn spare dät. Nohdemmet jet anderes jefonne hat, we-eitav vom Schuss, hät et zom Abschied heimlech der Madam e Stöckche Limburger Käs henech de Heizung jeklemmt. „Wat meinste, wat die jesöck hann, wie sech bei aufsteigender Wärme der Jeruch von dem Limburger em Salon verdeilt hält. En We-eil wären se wohl keine Jesellschaft mieh jenn hann könne,“ meint et rech zefridde.

Su jesat, es et höck richteich, allen Mädche en Ousbildung für et Lewwe ze ermühelijje, domet se von keinem avhängesch senn. Och en jod Portion Selvsbewusstsein kann net schade. Höckzedach däten se de Madam de Meinung jeije, dem jonge Här oder dem jnädigen Här op de Fengere kloppje. Dat es doch immerhin en Fortschritt, wenn et och Jahrzehnte douere mot.